



00479

蘇坡制草卷之三

詩名文庫

明學士黃洪憲撰

福建布政使司左布政使陶大順并妻誥命

一道

書錄叢書

白河文庫

制曰九牧分領外方允為良翰七閩介居南服尤

稱奧區惟保釐之績既弘斯寵賚之恩特懋爾福

建布政使司左布政使陶大順才識淵闊器資篤

亮賢科發穎起部蜚聲歷兵曹而懋贊戎昭晉臬

藩而克貞憲度爰遷左轄用長連州秉公持廉樹

表儀於羣吏頒條布政敷惠愛于百城爾閱來聞

蘇坡制草 卷之三

朕心嘉悅茲授爾階通奉大夫錫之誥命於戲寵

綉特頒用旌往勩介圭申勅尚勵新功朕方憂水

旱之日聞鞫哉庶正爾益懋旬宣于時叙式是南

邦欽哉

制曰价人惟藩樹鴻猷於四國君子偕老宜象服

于六珈式著徽音重加顯號爾福建布政使司左

布政使陶大順妻累封恭人諸氏四德夙嫻二宗

咸慶孝敬奉春秋之祀柔貞匡夙夜之勤惟出自

北門無室人之摧謫庶惠此南國有岳伯之旬宣

茲特加封爾為夫人祇膺鸞誥之華永贊羔絳之

節

父母

制曰四岳旬宣君得臣而弘化一經啓佑父因子以知名矧壘篋迭奏于明廷宜綸綍重申于禰廟爾原任鴻臚寺主簿累贈通議大夫詹事府詹事兼翰林院侍讀學士陶師賢乃福建布政使司左布政使大順之父體道惇倫施仁扶義弓冶丕承乎先業箕裘克振于後人昔因講幄之勞曾推恩于仲氏今念藩垣之績用貤爵于冢賢特贈爾爲通奉大夫福建布政使司左布政使龍章丕耀于

鑿坡制草

卷之三

二

封槐馬鬣重光于奕葉

制曰良臣有屏翰之功化行南國慈母啓篤生之烈譽美北堂肆酬罔極之恩宜有重申之命爾累贈淑人韓氏乃福建布政使司左布政使陶大順之母履儉寶慈儲祥委祉相夫以承先業迪子而服大僚家有二難驗劬勞于機杼國膺三命增寵耀于泉扃茲特加贈爾爲夫人式展孝思永光潛懿

山東布政使司左布政使徐元氣并妻誥命  
一道

制曰朕惟國家以東藩爲蔽用翼門庭岳伯以左  
轄爲尊式資屏翰豐功克建晉錫攸隆爾山東布  
政使司左布政使徐元氣清操偉度卓識宏猷歷  
郎署而展采兵刑守專城而宣猷閩蜀乃踐臬藩  
之任爰登長伯之尊轉餉蜚芻佐軍興于六詔發  
倉賑之拯民命于三齊勞勩弘多勲猷特茂茲因  
課最授爾階通奉大夫錫之誥命於戲畢公保東  
土澤潤生民申伯式南邦藩宣四國朕方憂東人  
鑿坡制草 卷之三 三  
之失職爾其念中澤之劬勞益懋前功以需後命  
欽哉

制曰良臣奏方岳之勲介圭用錫淑媛表山河之  
度從爵爲榮厥有彝章奚分存沒爾山東布政使  
司左布政使徐元氣妻累封恭人張氏秉德柔恭  
相夫順正雖居處燕私之際不廢箴規迨委蛇象  
服之年猶甘布素及雄藩之奏最憫燕婉之淪亡  
是用贈爾爲夫人恩耀玄扃譽流彤管

祖父母

制曰价人維藩懋著旬宣之績君子有穀實開啓

佑之原。旣緣子以榮親。亦自親而率祖。爾徐訪。乃山東布政使司左布政使。元氣之祖父。通經學古。扶義好施。生有憲老之榮。歿列鄉賢之祀。衍螽斯而昌族。貽厥孫謀。培麟定以生才。戎有良翰。茲特贈爾爲通奉大夫。山東布政使司左布政使。龍章丕耀于重泉。駿惠光昭于奕世。

制曰。孫謀之善。寔本前休。士業之修。厥踐內德。肆褒崇之上逮。必祖妣之兼隆。爾孟氏。乃山東布政使司左布政使。徐元氣之祖母。毓貞望族。儷燾高閔。履儉寶慈。賢旣配乎君子。儲祥委祉。慶乃發于聞孫。睠惟四國之旬宣。追遡重闈之啓佑。是用贈爾爲夫人。受介福于王母。集蕃祉于後昆。

制曰。朕惟積善之慶有餘。明德之後必達。故子孫競美爲四目四聰之臣。其祖妣貽謀。非一手一足之力。爾何氏。乃山東布政使司左布政使。徐元氣之繼祖母。肅雍稟範。拮据持家。訪績躬勤。爰佐肇基之緒。含飴俯育。適開裕後之祥。咨四岳而有功。知重闈之嗣燾。是用贈爾爲夫人。烝昇並綏。雲仍永茂。

制曰。四岳旬宣。君得臣而弘化。一經佑啓。父因子以知名。肆渙寵于藩侯。宜升榮于禰廟。爾原任江西。饒州府。浮梁縣主簿。累贈中憲大夫。四川。成都府知府。徐衢。乃山東布政使司。左布政使。元氣之父。博雅名儒。清貞偉士。鳳棲在枳。生嘗有德于民。鴻羽爲儀。沒而可祭于社。惟嗣賢之競爽。知義訓之有徵。是用加贈爾。爲通奉大夫。山東布政使司。左布政使。洵膺有赫之榮。爰究未施之志。

制曰。良臣有屏翰之功。表于東海。慈母啓篤生之烈。頌彼北堂。肆酬罔極之恩。宜有重申之命。爾累

贈恭人劉氏。乃山東布政使司。左布政使。徐元氣之母。貞靜性成。孝慈天厚。毓英玄圃。家鍾八士之祥。稱最白眉。人羨二難之美。可無湛渥以表休嘉。是用加贈爾。爲夫人。載颺彤管之芳。永播黃壚之耀。

四川布政使司左布政使劉繼文并妻誥命  
一道

制曰朕惟蜀都天府橫六合而茂八區方岳鉅寮  
總百城而制千里式建保釐之績庸加寵賚之恩  
爾四川布政使司左布政使劉繼文器局閎深才  
猷茂裕蜚英廷對試政邑符由郎署而擢諫垣聲  
高蹇諤自叅藩而遷總臬績懋澄清乃建牧于七  
閩遂長藩于三蜀扶疲恤困布德澤于民夷祛弊  
釐奸樹表儀于僚屬方閱程書之最已躋專席之  
班茲仍授爾階通奉大夫錫之誥命於戲勿剪其

鑿坡制草

卷之三

六

棠方仰召公之遺澤有嚴采芑期宣方叔之壯猷  
俾百粵無桴鼓之驚斯一人免衣袂之慮欽哉

制曰錫圭受瑞國重良臣結悅施衿家嚴始配肆  
疏榮之下逮雖沒世而不忘爾四川布政使司左  
布政使劉繼文妻贈安人王氏女師稟訓君子好  
述夫階崇陟于方州閩範乂淪于早世雖雞鳴櫛  
盥會同隱約之年而象服委蛇不逮偕榮之日茲  
特加贈爾爲夫人膺顯綽于重申播幽芳于無斁  
制曰賢臣作牧稱良翰于維寧淑媛宜家嗣徽音  
于思媚肆舉酬庸之典宜申從爵之章爾四川布

政使司左布政使劉繼文繼室封安人王氏威儀  
棣棣令德温温季女有齊克繼河洲之好君子于  
役無嗟蜀道之難考績藩垣加恩閨壺是用封爾  
爲夫人載膺綸綍之褒益謹矜肇之訓

祖父

制曰朕聞山甫永懷續戎祖考召伯維翰受命康  
公蓋源深者其流長而德懋者其報遠爾劉鎔乃  
四川布政使司左布政使繼文之祖父韜華弗試  
積善有餘行表鄉閭夙備詒謀之則德垂後裔遂  
開繩武之賢睠惟四岳之旬宜宜邇百年之啓佑  
茲特贈爾爲通奉大夫四川布政使司左布政使  
鴻名播宗祏之光駿業永雲仍之庇

父母

制曰价人維藩懋著干城之績君子有穀實開堂  
構之基孚號王廷重褒禰廟爾贈承德郎禮部祠  
祭清吏司主事劉貞乃四川布政使司左布政使  
繼文之父鶉居樂道燕翼詒謀詩禮相傳丕顯一  
經之啓佑箕裘克紹聿昭四國之旬宜尚有典刑  
庸升秩號茲特加贈爾爲通奉大夫四川布政使  
司左布政使龍章歆再命之榮馬鬣煥百年之貴



制曰朕嘉良臣藩翰之功介圭用錫邇母氏篤生  
之烈顯綍重褒豈曰靡依足爲不朽爾封太安人  
黃氏乃四川布政使司左布政使劉繼文之母珩  
璜中節蘋藻揚芬操井臼以躬親迪詩書而訓後  
畫荻之言具在甘棠之政攸敷未念劬勞宜申愍  
卹是用贈爾爲夫人匪直爲幽壤之光亦以慰終  
天之感

河南布政使司左布政使莊國禎并妻諾命  
一道

制曰九牧分領外方。允爲良翰。三河介居中土。尤稱奧區。惟保釐之績。旣弘。斯寵賚之恩。特懋。爾河南布政使司左布政使莊國禎。清貞篤亮。敏博淵宏。循良茂著。于花封。譽望蔚隆。于瑣闥。晉臬藩而翱翔四省。文武兼資。更長貳而敷歷九官。猷爲並懋。載遷左轄。實領中州。剔弊釐奸。樹表儀于羣吏。拯災恤困。敷惠愛於百城。最績來聞。朕心嘉悅。特授爾階。通奉大夫。錫之誥命。於戲。畢公尹周。惟德惟義。申伯宅謝。于蕃于宣。皆在封域之間。可爲鑒觀之準。尚圖後效。追匹前休。欽哉。

制曰。价人維藩。樹鴻猷于四國。君子偕老。宜象服于六珈。式著徽音。重加顯號。爾河南布政使司左布政使莊國禎。妻累封宜人王氏。聞族毓祥。望宗媿美。孝共無斁。司中饋以奉尊章。貞靜有常。佐下帷而匡碩彥。惟是藩宣之烈。弘多儆戒之功。是用加封爾爲夫人。尚敦靜好之風。益迓駢蕃之寵。

祖父母

制曰。朕惟申伯。錫圭。亟營寢廟。召公賜鬯。作考敦

彝肆昭繩武之功宜表詒謀之善爾原任廣東廣州府新會縣儒學教諭莊安期乃河南布政使司左布政使國禎之祖父學冠儒林行爲士望膠庠振鐸端模範以作人笥篋遺經啓簪纓而昌後康侯用錫烈祖有光是用贈爾爲通奉大夫河南布政使司左布政使命秩丕覃于再世恩華永賁于重泉

制曰國家建麾而作牧允賴良臣君子有穀以詒孫亦資淑媛情均似續禮並褒崇爾屈氏乃河南布政使司左布政使莊國禎之祖母珩璜中節蘋藻流芳茂揚江漢之風宜其家室克相河汾之教貽厥子孫咨四岳而有功遡重闈之遺澤是用贈爾爲夫人並隆烝畀之儀益衍雲仍之慶

### 父母

制曰王者建牧綏民維屏維翰人臣事君資父母構肯堂宜渙號于王廷用升榮于禰廟爾累封奉政大夫浙江按察司僉事莊偁乃河南布政使司左布政使國禎之父含貞抱璞樂道停倫信義洽于鄉評秉心無競詩禮敦于家訓式穀有徵睠茲重地之旬宣本爾嚴庭之啓佑是用贈爾爲通奉

大夫河南布政使司左布政使階益崇於三命靈式慰于九原

制曰皇帝清問下民詢于四岳大夫追崇先世懷我二人旣旌德于義方宜歸功于聖善爾累贈宜人楊氏乃河南布政使司左布政使莊國禎之母圖史芳規山河令度服縞綦而明婦順相敬如賓操丸菽以樹母儀能勞其子將昌閥閱遽棄栳捲是用加贈爾爲夫人六珈未耀于中閨五鼎常歆于下里

制曰朕錫命藩臣本原慈懿念貽哲篤生之自式表閨賢知嗣徽衍慶之由載頒壺秩爾累封宜人陳氏乃河南布政使司左布政使莊國禎之繼母旣孝而慈終溫且惠衿鞶守訓旣克紹夫前徽機杼宣勞遂勗成乎後嗣考勲猷于中土昭啓佑于北堂茲特加封爾爲太夫人祇服鴻休永光燕喜

山西布政使司右叅議王學書并妻誥命一  
道

制曰國家重鎮分藩犬牙相制寬則建威銷萌爲  
國屏翰急則調兵轉餉克贊元戎匪是壯猷疇堪  
重寄爾山西布政使司右叅議王學書器識淵宏  
才猷敏練自使軺蜚譽計部宣猷晉陟藩司分符  
上谷而爾能拊衆威敵布德揚靈使款塞彌堅烽  
塵寢息及茲奏最予懋乃功特授爾階朝議大夫  
錫之誥命夫狡虜何厭之有雖金繒歲賚姑事羈  
縻而繕墉治兵亟宜先備爾尚時參石畫益愆遠  
猷毋以玩愒而啓戎心毋以承平而弛邊備欽予  
時命其惟有終

鑾掖制草

卷三

十二

制曰士脫蒯緱而躋金紫豈其昂貴而忘御窮故  
國有榮章必追始配所以敦伉儷重人倫也爾山  
西布政使司右叅議王學書妻贈安人于氏休有  
令德嬪于哲人敬順以奉尊章儉勤而襄夫子翟  
封未逮燕婉云亡是用贈爾爲恭人載揚中壺之  
徽永作下泉之耀

制曰朕惟草虫志感杖杜懷人先王憫大人行役  
而體念其室家何至也朕思邊疆之吏靡室靡家

寧不賚及中壺哉爾山西布政使司右叅議王學書繼室封安人鄭氏動閑內則音嗣前徽爾夫宣力于邊陲由汝服勤于閨幄宜酬嘉績載需恩綸是用封爾爲恭人荐膺翟第之華彌勵燕私之儆

### 父母

制曰朕讀六月之詩叙薄伐虜功而終歸于孝友肆念邊吏之有勞者而進律酬庸加恩禰廟廣孝思也爾累贈承德郎戶部湖廣清吏司主事王兌乃山西布政使司右叅議學書之父仁心爲質直道而行長厚重于鄉評義方嚴于庭訓易成哲嗣展采明時朕科第郎官已膺再命茲加贈爾奉直議大夫山西布政使司右叅議申錫屏藩之寵茂增堂構之光

制曰古之仕者駕駱而歌捧檄而喜念將母也乃有啣恤栝棬茹哀風木匪藉國恩何以報罔極哉爾贈安人汪氏乃山西布政使司右叅議王學書之母明章婦順聖善母儀從夫伴載眷之風愛子勵和丸之教慈音已邈淑問彌彰是用贈爾爲恭人六珈未耀于萱庭五鼎長歆于蒿里

山東按察司副使田樂義并妻誥命一道

制曰。令甲設憲。臣備兵阨塞。寬則衣繡斧。刺舉不法。急則詰戎兵。扞衛非常。矧清原水陸要衝。軍民雜處。奸宄易集。按治爲難。爾山東按察司副使田樂義。擢穎廷掄。蜚聲郡理。譽望茂隆。于瑣闥勳猷。丕著于臬藩。乃晉今官。備兵東省。而爾能攬條章。以肅吏治。飭武事。以折奸萌。最績來聞。朕心嘉悅。茲特授爾階中憲大夫。錫之誥命。夫乘軒攬轡。志在澄清。佐轄分麾。職司屏翰。爾旣擢叅楚藩。其布德揚靈。贊襄牧伯。舉全楚之民。而衽席之。朕將有顯陟焉。欽哉。

樂義制草

卷之三

十四

制曰。羔羊大夫。詩人本之內德。采蘋作室。人交謫北門刺焉。此褒叙臣勞。必疏榮伉儷也。爾山東按察司副使田樂義。妻累封孺人杜氏。治內肅雍。相夫順正。勤泉綵而勸學。操荆布以從官。爾夫歷仕有功。茂宣華問。惟爾實左右之。是用封爾爲恭人。洵膺翟芾之華。益勵雞鳴之儼。

父母

制曰。國家課績酬庸。緣子貴父。雖布衣蔬躋。得徼一命之寵。而生列冠紳。沒輝廟祏。甚盛典也。爾累

贈徵仕郎戶科給事中田可猷乃山東按察司副使樂義之父敦倫樹誼履樸含淳孝友重于鄉評義方淳于庭訓勗成哲嗣展采明時惟式穀爾詒惟令名爾享是用贈爾爲中憲大夫山東按察司副使載荷龍章之寵益增馬鬣之光

制曰詩稱明發不寐有懷二人人子不幸失怙而得徵恩廷命榮壽慈闈詩人所爲賦燕喜也爾累封太孺人常氏乃山東按察司副使田樂義之母夙閑內則穆踐閭儀勤并杵以相夫操荻丸而訓子官評鬯譽慈教益彰是用加封爾爲太恭人茂

膺楓陛之恩益介萱闈之祉



甘肅行太僕寺卿兼陝西按察使僉事張孔  
修并妻誥命一道

制曰朕聞駟鐵興秦駉牝壯衛肆國家設太僕以  
董馬政而又建行寺于邊疆任至重也矧河西控  
制羗虜戎馬不飭曷佐軍興爾甘肅行太僕寺卿  
兼陝西按察司僉事張孔修器局端宏才猷敏練  
筮官巖邑載佐專城居郡守而茂著循良副臬司  
而蔚隆功望乃遷今職牧事是司而能秉心塞淵  
蒞事精敏克修馬政三載奏功特授爾階中大夫  
錫之誥命今疆場無虞罔政日弛使牧地淪于侵

鑿坡制草

卷之三

十六

占而游騰失于孳生是墮軍實而忘捍禦也爾尚  
益愆前猷勉稱任使朕不忘爾功欽哉

制曰朕觀小戎駕騏驎駉駟驪知牧事獨盛于西  
也然其詩曰言念君子載寢載興則于室家之助  
有深感焉爾甘肅行太僕寺卿兼陝西按察司僉  
事張孔修妻封宜人王氏治內肅雍相夫順正勤  
臬綵而勸學操荆布以從官問大夫之勤勞數馬  
以對嘉令妻之儆戒匪雞則鳴是用封爾爲淑人  
游沐鴻章益修燕譽

祖父母

制曰朕褒崇臣勩寵貴宗祊惟是三品之階得追榮其先祖而况一命之士素有績于生民宜需寵章以酬世德爾原任直隸安慶府檢校張珂乃甘肅行太僕寺卿兼陝西按察司僉事孔修之祖父毓秀賢關咸推博雅宣勞郡幕茂著廉平紹祖父之家聲開子孫之世緒適觀繩武丕顯詒謀茲特贈爾爲中大夫甘肅行太僕寺卿兼陝西按察司僉事龍章丕耀于重泉駿惠光昭于奕世

制曰易稱王母介福詩歌女士從孫故課賞大僚必追榮祖妣家之善慶國有彝章爾蘇氏乃甘肅鑾坡制草  
卷之三  
十一  
行太僕寺卿兼陝西按察司僉事張孔修之祖母貞淑褪身肅雍治內佐餽而匡君子弗墜家聲舍飴以啓聞孫祗勤國事徽音如在愍綍宜申茲特贈爾爲淑人永貽彤管之芳丕闡玄扃之耀

### 父母

制曰士有隱德無所表見惟個儻慕義之人稱焉矧又詒穀後賢服勞王事國家譽命所由逮也爾贈奉政大夫陝西延安府同知張希賢乃甘肅行太僕寺卿兼陝西按察司僉事孔修之父敦仁樂善扶義好施孝友著于宗盟義方篤于庭訓爾子

歷官奏績，駟牧有聲。惟爾實式，穀之是用。加贈爾爲中大夫，甘肅行太僕寺卿，兼陝西按察司僉事，載荷廷綸之寵，丕昭泉壤之光。

制曰：朕惟孝子事親，鍾釜爲小，睠懷爲暱。惟是立身揚名，俾生得珈封而沒歆，鼎祀乃所爲令聞。長世也。爾封太宜人王氏，乃甘肅行太僕寺卿兼陝西按察司僉事張孔修之母。明章婦順，聖善母儀。從夫侔載，畚之風愛子，勵和丸之教。慈音已邈，淑問彌彰。是用贈爾爲淑人，載膺綸綍之褒，永慰楮卷之慕。

福建都轉運鹽使司運使李大吉并妻誥命

一道

制曰朕惟嗇運之設國計攸關顧士大夫卑者私爲利藪高者視爲冗員先帝俞銓臣議欲慎其選而優其格誠重之也爾福建都轉運鹽使司運使李大吉操履端貞才猷敏練自名封振采瑣闥升華出守專城載掄筦榷而爾庶足以率屬明足以釐奸盈縮惟宜輸將允賴茲以歲滿授爾階中大夫錫之誥命夫閩多廣斥而行鹽之地寡故商賈無所牟大利而國賦亦詘爾尚殫智矢謀深籌利便俾上不虐歲額下不病商民朕將顯庸以酬乃績欽哉

制曰羔羊大夫詩人本之內德采蘋作室人交謫北門刺焉此褒叙臣勞必疏榮伉儷也爾福建都轉運鹽使司運使李大吉妻累封孺人郭氏治內肅雍相夫順正勤泉絲而勸學操荆布以從官爾夫學究典墳仕修簞篋惟爾實左右之是用封爾爲淑人游膺翟芾之華益勵鷄鳴之儼

祖父母

制曰朕惟源深者流長善積者慶遠國家敷錫鉅

寮疏榮祖廟所以章世德廣孝思也爾李昂乃福建都轉運鹽使司運使大吉之祖父直道而行仁心爲質鄉人推其長厚里俗薰而善良令德考終詒謀裕後至孫而顯于祖有光茲贈爾爲中大夫福建都轉運鹽使司運使光賁宗祊慶延祚胤

祖母

畧同張孔修

### 父母

制曰國家課績酬庸緣子貴父雖布衣蔬躋得徼一命之寵而生列冠紳沒輝廟祐甚盛典也爾累贈徵士郎工科右給事中李璧乃福建都轉運鹽使司運使大吉之父禔身樸茂賦性剛方月旦重於鄉評詩書衍爲庭訓爾子歷官中外卓有能聲爾之式穀徵已是用贈爾爲中大夫福建都轉運鹽使司運使載荷廷綸之寵丕昭泉壤之光

制曰朕惟南棘懷劬匪莪志感孝子懷母何日忘之乃有身旣顯榮而母躬不閱國無愍章報于何有爾累贈孺人張氏乃福建都轉運鹽使司運使李大吉之母肅雍婦道聖善母儀躬并杵以相夫操荻丸而訓子六珈未逮五鼎常歆是用贈爾爲淑人載揚顯號于萱庭永慰慈靈于蒿里

制曰繼母儼尊于父訓育厥子卽屬毛離裏何以異焉國家緣情而並貴之恩至渥也爾累贈孺人丁氏乃福建都轉運鹽使司運使李大吉之繼母蘋藻嗣徽鳴鳩均愛拮据以綜家務恩勤而佐義方祿養弗躬愍褒再錫是用贈爾爲淑人祇服絲綸之寵聿酬機杼之勞

直隸順德府知府王守誠并妻誥命一道

制曰朕惟漢世循良三輔爲最今鉅鹿實畿輔郡  
朕慎簡賢守俾之布德綏民豈惟九邑承流冀京  
師并蒙福也爾直隸順德府知府王守誠志行端  
淳才猷敏茂掄材秘館蜚譽瓊垣擢守郡符寄之  
司牧而爾敷政有體持操彌貞使寮屬承風士民  
頌德朕甚嘉之茲以歲績授爾階中憲大夫錫之  
誥命夫漢選諫議大夫出守郡國其高第者徵入  
爲九卿誠重之也爾尚益懋前猷勉圖後績服在  
大僚非異人任往欽哉

鑿坡制草

卷三

三

制曰士有糟糠之婦御窮于微比其顯榮而從爵  
也生通禁籍沒耀壞封非以章內助哉爾直隸順  
德府知府王守誠妻封孺人高氏夙秉女貞于歸  
士彥相夫績學歷仕有聲一命甫沾溘先朝露亦  
孔戚矣是用贈爾爲恭人膺顯號于重申播幽芳  
于無斁

制曰婦人從夫其始而御窮者嘗勞繼而履貴者  
嘗佚故采繫尸季雞鳴戒盈所以交重于風人也  
爾直隸順德府知府王守誠繼室張氏徽柔嗣音  
儉勤襄政恪遵女誠以佐官常郡治有聲閨儀茂

著是用封爾爲恭人祗承象服之華益勵燕私之傲

父母

制曰夫士沉寘巖穴無所表見惟倜儻慕義之人稱焉矧又詒穀厥子樹勲明時國家疏恩恒必逮之爾贈徵仕郎刑科給事中王京乃直隸順德府知府守誠之父惇倫睦族好義周貧積善自躬亢宗有後爾子服官中外蔚有令聞爾之義訓彰矣是用贈爾爲中憲大夫直隸順德府知府祗歆再命之榮永作九原之賁

鑾坡制草

卷之三

三三

制曰朕讀周南而知螽斯之慶蓋起于樛木之仁也國家課績臣工疏榮嫡母非所以敦本而崇報哉爾贈孺人李氏乃直隸順德府知府王守誠之嫡母靜正宜家慈仁逮下蘋蘩而襄饋祀丸荻以佐義方有子亢宗而祿養弗逮朕甚閔之是用贈爾爲恭人載揚中壺之徽永作下泉之耀

制曰朕惟石以玉輝川因珠媚物生有之惟人亦然故國家疏恩臣下必逮所生以廣孝也爾贈孺人楊氏乃直隸順德府知府王守誠之生母衾禩遵範釜錡服勞篤生嗣人爲予良牧官評懋暢慈



範足徵是用贈爾爲恭人遠紆風木之悲式廣露  
蕭之澤

藝坡制直

卷三

詩



浙江寧波府知府蔡貴易并妻誥命一道

制曰間者四方水旱頻仍蒸庶失業朕詔有司輕徭薄賦問民所疾苦惟二千石紀綱州邑得察舉吏治而詔之監司任至重也爾浙江寧波府知府蔡貴易志行端醇才猷敏茂自宣勞邑宰著望留曹爰剖郡符寄之民牧而爾能廉平以敷政豈弟以宜民寮屬承風黎民懷惠朕甚嘉之茲以歲績授爾階中憲大夫錫之誥命夫明州爲東南要郡今海氛雖靖而軍民錯處制馭恒艱尚益茲前猷勉圖後効服在大僚非異人任也懋之哉

欽定四庫全書

卷三

三

制曰士離蔬躋而登顯榮惟是糟糠之婦黽勉御窮後有笄珈寧忘管蒯此朝廷疏恩必先始配也爾浙江寧波府知府蔡貴易妻累贈安人葉氏溫惠裊身肅雍治內筥筐以襄饋祀綵泉而佐詩書夫旣顯榮爾躬不閱朕甚愍之茲贈爾爲恭人搢明綸于三錫揚淑懿于九原

繼室黃氏畧  
同張孔修

父母

制曰君子賦事行刑必問于遺訓而咨諸故實矧黃綬在先朱輜在後庭聞有自貶榮容可後也爾原任廣西梧州府通判累贈承德郎南京戶部陝

西清吏司主事蔡宗德乃浙江寧波府知府貴易之父鄉闈脫穎別駕蜚聲惠政溢于甘棠義方徵于式穀雖施爲未竟而繼述有光追遡令謀宜申愍錫茲特贈爾爲中憲大夫浙江寧波府知府載沐國恩之寵不增家乘之光

制曰婦道含章無由自顯國家因夫若子而表章之生不得珈封沒猶歆鼎祀澤至渥也爾累贈安人洪氏乃浙江寧波府知府蔡貴易之母相夫順正勗子愛勞惟是別駕流芳專城奏最雖克自樹而婦順母儀兩見之矣是用贈爾爲恭人載膺綸綍之華益慰栝捲之惻

直隸河間府同知杜伸并妻誥命一道

制曰朕垂意至寧深惟民瘼數詔執事謹擇郡國長吏守丞可者以聞將以慰勉褒揚傳古錫爵增秩之義爾直隸河間府同知杜伸才猷敏達操履清貞擢自廷掄四更巖邑嘉其稱職晉貳專城而爾能豈弟以宜民廉勤以集事有司上爾歲閔中于賞率是用授爾階奉政大夫錫之誥命間者災旱頻仍蒸庶失業三輔之地騷然朕所爲宵衣而惕也爾尚殫心竭思協比爾長救元元之急朕且有顯陟焉欽哉

樂坡制草

卷之三

三七

制曰雞鳴徹夕錄于風詩嘉其能敦嬪則以禋士行也乃良臣修職懋功所在職辦其內助之賢不足多哉爾直隸河間府同知杜伸妻封孺人汪氏毓貞儒族儷美哲人孝敬以奉尊章儉勤而襄饋祀爾夫別歷郡邑靡室靡家惟爾實左右之是用封爾爲宜人懋宣靜好之音游迓駢蕃之渥

父母

制曰君子賦事行刑必問于遺訓而咨諸故實矧父子疇官世膺民社庭聞有自國命宜先爾原任雲南澂江府江川縣知縣進階文林郎杜鳴陽乃

直隸河間府同知伸之父鄉闈脫穎邑宰蜚聲惠  
政溢于甘棠義方徵于式穀雖施爲未竟而繼述  
有光追遡令謀宜申愍錫茲特贈爾爲奉政大夫  
直隸河間府同知載沐國恩之寵不增家乘之光  
制曰夫韞玉山輝藏珠川媚母謂閭行不外見也  
矧相夫作牧勗子成名婦順母儀可無褒揚以示  
勸哉爾封太孺人閔氏乃直隸河間府同知杜伸  
之母柔恭婦德聖善母儀樂綦縞以從夫操菽丸  
而訓子惟爾夫爾子郡邑蜚聲爾亦躬食其報茲  
特封爾爲太宜人祗服鴻休永光燕喜

直隸鳳陽府同知許應地

制曰朕聞周室思幽漢家復沛中都亦今之幽若沛也豈惟守貴得人允厥佐貳必慎簡譽髦以稱朕重湯沐之義爾直隸鳳陽府同知許應地遂學宏猷清操介節掄英鄉薦佐理專城而能豈弟宜民廉勤任事明作率先于州邑賢勞懋著於河渠薦牘有聞課書稱最茲授爾階奉政大夫錫之誥命於戲文武非二途軍民不異治爾今擢幕樞府協贊戎昭尚益懋清修勉圖職業朕有顯陟以酬汝庸欽哉

鑿坡制草

卷三

三九

直隸揚州府同知黃策

制曰今天下郡置守貳以左右斯民贊宣德化乃維揚地控三齊爲東南咽喉固江淮一都會也不有茂才孰堪貳政爾直隸揚州府同知黃策起自廷掄官於壯縣旣察廉而升留部復外補而倅方州載縮邑符尋遷郡貳而爾益修三事備舉六條歲閏來聞中於賞率是用授爾階奉政大夫錫之誥命夫政務非歷試不精民情非久親不達爾今剔歷州郡游刃有餘尚益懋前猷勉圖後效以稱朕惠康小民之意欽哉

直隸徽州府同知徐廷龍

制曰郡國長貳之官以惠利爲績日月爲勞其有  
敷歷後先年勞茂著者朝廷大賚恩必逮之爾直  
隸徽州府同知徐廷龍擢秀鄉闈筮官黌校爲邑  
播循良之譽司城著廉幹之稱兩佐郡符勤修職  
業名騰薦牘績在程書茲授爾階奉政大夫錫之  
誥命夫發鄣二郡壤相接也爾雖量移官品旣同  
法得通理尚勉樹明德益勵初心以求終譽朕有  
顯陟往欽哉

河南汝寧府同知周裔先

鑿坡制草

卷三

三十一

制曰今士大夫率重內而輕外不知劍斷割斯利  
才更練斯精故有別歷郡邑茂著年勞者朕且賜  
之璽書以需後命爾河南汝寧府同知周裔先擢  
自公車踐更名邑所至治辦晉貳專城而能豈弟  
宜民廉勤任事有司上爾歲闕中于賞率是用授  
爾階奉政大夫錫之誥命史稱沈蔡之間俗剽輕  
而寡積聚惟是賢守貳左提右挈勤恤民隱庶幾  
艾安尚毋薄汝南哉吾今陟爾矣

直隸廣平府通判王執法

勅曰國家列郡置守復設倅佐之所以共圖治理  
邇宣德澤也矧武安吾股肱郡苟有異政簡在朕  
心爾直隸廣平府通判王執法脫穎鄉闈筮官郡  
刺乃能實心任事潔已愛民署邑篆以能稱督屯  
牧而事集聲騰薦牘績在程書茲特授爾階承德  
郎錫之勅命夫古稱別駕展驥爲難朕今廣勵賢  
能寬其衡軛顧自樹謂何耳爾尚益勵初忱永終  
令譽惟予一人汝嘉

浙江台州府通判鄒通

藝坡制草

卷之三

三二

勅曰朕聞赤城之郡川澤沃饒其人民樸靜而俗  
儉約誠得良二千石而又有賢倅副之吾豈憂東  
甌哉爾浙江台州府通判鄒通起家廕胄簡幕民  
曹克踐厥猷擢之刺郡而爾躬操廉慎政尚寬平  
最課升聞中于賞率特授爾階承德郎錫之勅命  
夫朝廷任才必博稽功譽而叙進之爾旣擢典方  
州專城是寄其益多前功以永終譽惟予汝嘉懋  
哉

山東濟南府通判曹岡

勅曰國家屯重兵于遼鎮而金復海蓋特設郡倅



以董邊儲藉令羽檄旁午而軍無見糧士不宿飽謂軍興何爾山東濟南府通判曹岡掄英鄉省選刺專城而才足剴煩明能燭隱督餉則總核有條聽獄而平反悉當有司上爾歲闕中于賞率是用授爾階承德郎錫之勅命今單于款塞而遼左諸夷歲苦侵掠嬰城備禦饋餉爲先爾尚益忘前猷勉圖後効以裨朕安攘之計欽哉

貴州貴陽府通判王之稷

勅曰朕綜核吏治阜成兆民雖貴竹遐荒如在宇下匪惟二千石思得其人凡其貳其倅必茂簡賢

良以充厥任爾貴州貴陽府通判王之稷起家胄監典幕藩司嘉其行能擢之郡刺而爾能實心任事潔已愛民撫字寓于催科廉勤徵于署篆聲騰薦牘績在程書茲特授爾階承德郎錫之勅命夫古稱別駕展驥爲難朕今廣勵賢能寬其衡軛顧自樹謂何耳爾尚益殫初忱永終令譽惟予一人汝嘉

直隸永平府推官沈之唫

勅曰周制民有寃而長弗達者立于肺石使士聽其辭罪之今郡國長吏爰書一惟理官是聽必明而允乃稱此官爾直隸永平府推官沈之唫才猷敏練志行端醇擢自廷掄試爲郡理而能緣經輔律察麗求中吏無舞文民無寃獄薦剡之章交于公車茲因歲績授爾階文林郎錫之勅命夫北平吾股肱郡地邊虜而俗儻伎用法寬則民易玩操下急則變易生爾尚不剛不柔惟欽惟恤俾狂狴清而疆場安朕亦永有賴哉

勅曰用法之吏內長文而宜家之配資仁淑古有丹筆論囚而妻執燭相向恐其或濫者朕嘗念之重之爾直隸永平府推官沈之唫妻王氏稟範矜禱揚芬沼沚孝恭修職弘多主饋之勞仁恕典規勤相明刑之績是用封爾爲孺人祇迓龍章益修燕傲

直隸順德府推官饒崙

勅曰士起明經而司法理鷙悍者深文異愷者翫法有能亭疑察寃敬爾由獄惟朕實嘉與之爾直隸順德府推官饒崙才猷敏練蘊藉宏深擢自廷

掄官於郡理而宅心仁恕持憲平明嚴勾刷而吏絕舞文審平反而民無冤獄薦章交上僉曰汝賢茲以歲績授爾階文林郎錫之勅命夫畿輔股肱號稱難理奸憑城社則三尺易撓事係浩穰則六條難察爾尚秉公持明慎終如始青瑣蘭臺非異人任也往欽哉

勅曰自古哲婦相夫貽徽彤管處家則稱贈佩在公則賦雞鳴兼是二者而生不偕榮沒可無愆卹哉爾直隸順德府推官饒崙妻高氏溫惠禔身肅雍主饋躬泉綵而勸學操荆布以從官梁筍猶存譽流中壺

父母

勅曰朕惟飾吏以儒教忠在父士初授職而文學法理咸精其能則以家世業儒而式穀之功豫也爾生員饒國禎乃直隸順德府推官崙之父學窺卜璞不售而韋經有傳司理奏功義方丕著茲特贈爾爲文林郎直隸順德府推官欽承一命之榮永作九原之賁

勅曰古人斷獄平反多奉母訓然豈必生存爲然哉貽哲自初藥言在耳有能敬承而光大之母雖死猶生也爾張氏乃直隸順德府推官饒崙之母柔嘉婦德聖善母儀甘澹薄以佐儒風篤愛勞而襄義訓爾子慈祥折獄有不疑之風爾亦可稱雋母矣茲特贈爾爲孺人匪直爲幽壤之光亦以慰終天之感

直隸鳳陽府推官嚴昌世

勅曰理官計獄弊訟登中于天府患在以苛爲刻以察爲明有能亭疑釋冤文無害者朕不吝璽書璽坡制草  
卷三  
三五  
旌異之爾直隸鳳陽府推官嚴昌世器資深厚才諳敏明奮跡鄉閭掄司郡憲而能褪身清慎讞獄平明薦牘有聞課書稱最是用授爾階文林郎錫之勅命夫中都陵寢重地民疲而訟繁何敬非刑何度非及爾尚永肩一心敬明乃罰以稱朕好生之德行有顯陟欽哉

勅曰士離奧渫而躋顯榮孰與我攻苦而食淡者非糟糠之婦乎令甲疏恩寧忘始配爾直隸鳳陽府推官嚴昌世妻周氏柔嘉賦質淑慎爲儀孝敬以奉尊章儉勤而襄夫子芳徽旣遠譽問猶存茲

贈爾爲孺人紫綽歆承黃墟永耀

勅曰中都天下名郡爰書亦孔棘矣而理官一意奉公靡遑私顧其內助之賢有足多者爾直隸鳳陽府推官嚴昌世繼室宋氏內則夙閑前徽允嗣穆修壺政翼贊官常司理奏功予嘉乃德是用封爾爲孺人益守圖箴永光綸綽

直隸常州府推官余繼善

勅曰郡設理官佐太守以聽獄訟頗驚悍者深文巽悞者駝法有能亭疑察冤文無害者朕不吝璽書旌異之爾直隸常州府推官余繼善才猷鬯達

蘊藉閎深擢自廷掄官于郡理而宅心仁恕持憲肅清嚴勾刷而吏絕舞文審平反而民無冤獄薦剡之章交公車矣茲以歲績授爾階文林郎錫之勅命古稱延陵多禮義衣冠之俗今豪奢相尚夸誕相高月異而歲不同矣爾其明罰勅法哀敬求情以輔朕棐彞之治行有顯擢欽哉

勅曰士生于鄙野推選則祿焉女位于中閨芝爵則榮焉載在國典所以恤臣私而章婦順也爾直隸常州府推官余繼善妻張氏珩璜稟則沼沚揚芬孝敬以奉尊章儉勤而襄饋祀爾夫學優登仕

司理著聲惟爾實左右之是用封爾爲孺人祇膺  
鴻渥之頒彌勵燕私之傲

### 父母

勅曰天之道猶酌也挹彼不足注此有餘故士有  
夔屈于身而駿發于子國家疏恩上逮有天道焉  
爾余慶乃直隸常州府推官繼善之父董帷績學  
匡鼎傳經蚤馳譽于膠庠晚逃名于泉石雖懷才  
不試而有子能官睠惟理郡之猷式顯趨庭之訓  
茲特贈爾文林郎直隸常州府推官延式毅以彌  
昌耀焄蒿而末憚

### 鑿坡制草

卷之三

三七

勅曰朕嘉雋不疑斷獄平反聲施後世而深惡屠  
伯者之不仁也然而雋母加餐嚴月閣載諸彤  
管炯鑒在焉爾梅氏乃直隸常州府推官余繼善  
之母閑家有則逮下以仁勤儉以佐儒風愛勞而  
襄義訓理刑鬯譽慈訓足徵是用封爾爲太孺人  
祇膺楓陛之綸益介萱闈之祉

### 直隸鎮江府推官左之宜

勅曰朕念郡國計獄獎訟登中于天府自下而上  
惟理官是平有能亭疑察寃文無害者朕不吝重  
書旌異之爾直隸鎮江府推官左之宜器資沉厚

才具茂閎起自廷掄試于郡理而能操持平恕審鞫詳明薦牘文章課書稱最特授爾階文林郎錫之勅命夫京口瀕江而多盜獄訟滋繁縱則長奸苛則傷善爾尚益祗厥叙審克咸中以稱朕欽恤之意內署需賢匪異人任爾其懋哉

浙江杭州府推官王守素

勅曰郡理佐二千石計獄弊訟凡長吏爰書臺司陳臬惟理官是平有能亭疑察寃文無害者朕不吝璽書旌異之爾浙江杭州府推官王守素擢穎廷掄筮官郡理持身冰潔見事風生嚴勾刷而吏

樂坡制並

卷之三

三八

絕舞文審平反而民無寃獄聲騰薦牘績在程書茲特授爾階文林郎錫之勅命夫武林省會獄訟繁多往者軍民交訐幾爲亂階此誰非朕之嘉師其戕之也爾尚恫齔乃身敬爾由獄以稱朕好生之德行有顯擢欽哉

勅曰夫爲郡理者金矢時入案牘日親矧在省會尤稱繁劇而能夙夜靖共靡家靡室其內助有足多者爾浙江杭州府推官王守素妻武氏楊芬望族儷美儒英勤綵臬以佐下帷操布荆而襄理郡蕭然官舍宜爾室家茲特封爾爲孺人光膺綸綍

之褒益謹衿鞶之訓

父

勅曰理刑之官實司民命而能仁恕持心哀矜折獄迹其家世必有慈祥長者詒穀而教之忠疏恩可後哉爾王魯乃浙江杭州府推官守素之父仁心爲質直道而行孝友著于家庭長厚稱乎閭里篤生賢胤司理有聲旣壽且康躬食其報茲特封爾爲文林郎浙江杭州府推官祇服龍光益勤燕翼

浙江嘉興府推官俞咨禹

鑿坡制草

卷三

三九

勅曰士起明經而司法理慘刻者深文儒儒者翫法惟是決獄明允成輸咸孚乃愜朕心庶有格命爾浙江嘉興府推官俞咨禹清操雅度卓識宏猷起自廷掄試于郡理而能宅心仁恕秉憲嚴明精剖決而吏絕舞文審平反而民無寃獄聲騰薦牘績在程書茲特授爾階文林郎錫之勅命夫嘉固全吳腴壤也今歲青民饑閭閻日困而或煩擾于苛吏拘牽于微文不得永終性命朕甚閔之爾尚恫瘝乃身明德慎罰以永終譽往欽哉

父



勅曰朕觀新進之士類多以苛爲刻以察爲明豈其質性則然哉或漸涵庭訓素無以仁厚之說詔之也爾俞瑤乃浙江嘉興府推官咨禹之父含真守璞樂善惇倫長厚重于鄉評義方篤于庭訓惟良折獄式穀有徵是用贈爾爲文林郎浙江嘉興府推官歆服廷綸永光廟祔

浙江嚴州府推官魏良靜

勅曰理官計獄弊訟登中于天府患在以苛爲刻以察爲明有能亭疑釋寃文無害者朕不吝璽書旌異之爾浙江嚴州府推官魏良靜擢穎鄉闈筮官郡理乃能操持廉恪審克詳明俾吏無舞文民無寃獄薦章交上僉曰汝賢茲以歲績特授爾階文林郎錫之勅命志稱嚴陵民俗淳厚可以卧治不可以勞理爾益顧乃德遠乃猷以稱朕好生之意行有顯陟欽哉

江西贛州府推官柳希點

勅曰四方司政典獄繩以惠文廉以憲臬而理官則佐郡守推鞠爰書登中于上惟明克允乃稱厥官爾江西贛州府推官柳希點清操玉潤邃養淵停擢自廷掄試爲郡理而能哀矜折獄廉慎居官

吏絕舞文民無濫罰薦剡之章交公車矣茲以歲  
績授爾階文林郎錫之勅命夫虔地山長谷荒其  
民漁獵山伐仰機利而競錐刀何度非訟何敬非  
刑尚克時忱以永終譽往欽哉

河南彰德府推官張應登

勅曰郡設理官聽獄凡長吏爰書臺司陳臬悉賴  
其亭平而後上下簡孚成輸咸當惟明克允乃稱  
此官爾河南彰德府推官張應登清操雅度敏識  
通才擢自廷掄試爲郡理而能哀矜審克察麗求  
中俾吏無舞文民無冤獄薦章交上僉曰汝賢茲  
以歲闋授爾階文林郎錫之勅命夫周禮荒政緩  
刑爲先間者歲比不登大梁之民化離失所吏或  
以苛察亟疾相高是重傷也爾尚恫瘝乃身明德  
慎罰以永終譽欽哉

四川成都府推官李廷謨

勅曰朕歲遣使者以惠文彈治不法察舉吏弊而  
理官實耳目之有能亭疑察寃文無害者朕不吝  
璽書旌異焉爾四川成都府推官李廷謨學懋承  
家才優用世蜚英大對司理名邦而能廉慎居官  
明清折獄聲騰薦牘績在程書茲特授爾階文林

郎錫之勅命史稱蜀郡淫佚褊昵好文刺譏爰書亦孔棘矣爾其益操敬忌罔非在中以贊朕斐彝之治行有顯擢欽哉

雲南武定軍民府推官胡國屏

勅曰郡設理官佐太守以聽獄訟惟是昆州遠徼蠻獍雜居俗儻伎而難治非良折獄何以禁虜而安民也爾雲南武定軍民府推官胡國屏擢秀鄉闈筮官黌校嘉其造士畀之理刑而爾執憲平明宅心仁恕民無冤獄吏無舞文甄叙歲勞中於賞率茲特授爾階文林郎錫之勅命間者南詔用師蠻坡制草

卷之三

四十二

滇中騷動而或煩擾於苛吏拘牽於微文是猶治絲而焚之也爾尚洞燦乃身明德慎罰以稱朕好生之意欽哉

雲南臨安府推官甘士元

勅曰朕觀周制凡窮民有寃者立于肺石使士聽其辭訊之今郡國之獄雖有長吏爰書而亭疑釋寃實在司理爾雲南臨安府推官甘士元掄英恩選筮仕理官乃能廉潔裊身明清折獄署篆而才餘游刃亭刑而寃徹覆盆薦牘屢聞課書稱最茲特授爾階文林郎錫之勅命夫甸町去京師萬里

而民夷錯居號稱難治爾益明德慎罰拊衆綏氓  
朝廷旌賢固不以資格限也汝其懋哉

勅曰牂牁遠在萬里而婦人從夫周旋于驚江絕  
棧之間朕未嘗不憫其勞也况夙閑內則有裨官  
箴者乎爾雲南臨安府推官甘士元妻周氏揚芬  
令族儷美高閎操絲枲以佐下帷躬篋筐而襄中  
饋爾夫蜚聲郡理靡室靡家惟爾實左右之是用  
封爾爲孺人尚交儆於雞鳴庶有光於象服

貴州都勻府推官胡考崇

勅曰郡設理官職專庶獄惟是貴竹遐荒軍民錯

懸披制草

卷之三

四十三

居俗雜夷而難理何察非訟何敬非刑爾貴州都  
勻府推官胡考崇學紹庭聞名膺鄉薦筮官郡理  
越在遐方爾能廉平不苛讞決惟允歷有歲績登  
於薦章茲特授爾階文林郎錫之勅命今律令繁  
興吏或奇請他比以苛爲刻朕念遠方赤子控訴  
無由爾尚恫瘝乃身益祗厥叙以稱朕欽恤之意  
懋哉

